

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-01242-2014
Broj akta: 01EH-001
Gračanica, 18. 03. 2014. godine

Z A P I S N I K
SA VANREDNE SJEDNICE OPĆINSKOG VIJEĆA
GRAČANICA

Održane dana 18. 03. 2014. godine u sali za sjednice nove zgrade Općine Gračanica, sa početkom u 11.00 sati.

Sjednici je prisustvovalo 29 članova Općinskog vijeća Gračanica. Odsutna je bila Ahmetašević Jasenka.

Sjednicu je zakazao i istom predsjedavao Edin Ibrišević, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća Gračanica sjednici su prisustvovali i: Općinski načelnik Nusret Helić, Azra Mustajbašić, pomoćnik načelnika za odnose sa javnošću, općinski pravobranilac Jasminka Imširović, šefovi službi za upravu Senaida Šaković, Aida Hodžić, Mustafa Bajić i Zijad Dedić, predstavnici Plenuma građana, Građanske inicijative i akcije, direktori i predsjednici upravnih i nadzornih odbora, javnih zdravstvenih ustanova, javnih ustanova i javnih preduzeća, te predstavnici sredstava informisanja.

Predsjedavajući Vijeća je pozdravio prisutne i predložio dnevni red vanredne sjednice vijeća sa jednom tačkom koja glasi:

1. INFORMACIJA O VISINI PLAĆA I DRUGIH NAKNADA U JAVNOM SEKTORU OPĆINE GRAČANICA, VISINI VIJEĆNIČKIH NAKNADA I PLAĆA UPOSLENIH U OPĆINI

Obrazloženje u ime Kolegija Općinskog vijeća Gračanica po predloženoj tački dnevnog reda iznio je Edin Ibrišević, predsjedavajući Općinskog vijeća:

“Materijal koji smo dobili sačinjen je na osnovu onoga što smo tražili od preduzeća. Preduzeća su dostavila načelniku informacije za one podatke koje smo tražili, te je u kabinetu načelnika sačinjena ova informacija.

Na osnovu dobijenih podataka u INFORMACIJI O VISINI PLAĆA I DRUGIH NAKNADA U JAVNOM SEKTORU OPĆINE GRAČANICA, VISINI VIJEĆNIČKIH NAKNADA I PLAĆA UPOSLENIH U OPĆINI, Klegij Općinskog vijeća Gračanica predlaže sljedeće zaključke:

1. Visina osnovne plate načelnika ne može biti veća od 3,5 prosječne plate u Federaciji BiH, plata direktora zdravstvenih ustanova ne mogu biti veće od 3,0 prosječne plate u Federaciji BiH, plata predsjedavajućeg Općinskog vijeća Gračanica ne može biti veća od 2,5 prosječne plate u Federaciji BiH, plate direktora ostalih preduzeća kojima je osnivač Općina Gračanica ne mogu biti veće od dvije prosječne plate u Federaciji BiH. Po ovoj odluci plate mogu biti i niže što se i preporučuje, ni u kom slučaju ne mogu biti više.

2. Općinsko vijeće Gračanica će na narednoj sjednici smanjiti naknade članovima upravnih i nadzornih odbora s tim da u zavisnosti od ustanove predsjednik nadzornog odbora može imati

najviše 200,00 KM, a članovi 150,00 KM i to u mjesecu u kojem se drži sjednica, a ako nema sjednice naknada se umanjuje za 50,00 KM.

3. Regres u preduzeću u kojem je osnivač Općina Gračanica, kao i u Općini Gračanica će se maksimalno isplatiti do 50% prosječne plate u Federaciji BiH, takođe regres se može isplatiti i manji ili nikako ako za to nisu stvoreni uslovi.

4. Topli obrok u preduzećima u kojima je osnivač Općina Gračanica može se maksimalno isplatiti u iznosu do 8,00 KM po danu, a isti može biti i manji u skladu sa mogućnostima ustanove.

5. Visina vijećničke naknade će se Odlukom Vijeća na narednoj sjednici smanjiti za 20%.

Kad je u pitanju ovaj peti zaključak naveo bih da je ovo općinsko vijeće od 2011. godine smanjilo paušal za 30% i sa ovim smanjivanjem od 20% došli bi na smanjenje od 50%. To je jedna dopuna. Druga dopuna, ja sam danas kontaktirao Skupštinu TK gdje su nam rekli da se u narednom periodu planira donijeti jedinstvena odluka kad su u pitanju vijećničke naknade za općine na području Tuzlanskog kantona. Kad ta uredba dođe, mi ćemo morati postupiti u skladu sa tom uredbom.

Dalje, u zaključcima se nalaže članovima upravnih i nadzornih odbora i načelniku općine Gračanica da u narednom periodu, najkasnije do 15 aprila 2014. godine, dostave podatke kojim su zaključke Vijeća implementirali u javnim ustanovama i preduzećima i Općini Gračanica. S tim u vezi direktori će dostaviti nove podatke sa dohocima i svim dodacima na platu. U slučaju neizvršenja Općinsko vijeće će se odlučiti za smjene upravnih i nadzornih odbora. Toliko.”

U diskusiji su učestvovali:

Mirza Omerdić:

“Moja diskusija će nažalost biti dobrim dijelom usmjerena na neke fundamentalne stvari koje opterećuju našu svakodnevnicu, što je možda i korak unazad u odnosu na startnu poziciju sa vanredne sjednice Općinskog vijeća. Da podsjetim, danas smo trebali rješavati važne stvari zbog kojih je sjednica i zakazana. U početku bih kazao svoj lični stav, koji je ujedno i stav SDA vezan za dokument koji smo primili u materijalima, odnosno Informaciju o plaćama i naknadama upravnih odbora i uprave, zaposlenih u javnom sektoru čiji je osnivač Općina Gračanica. Da kažem da sam bio razočaran, ne bih rekao istinu jer sam zapravo i očekivao da će izvještaj biti takav kakav jeste. Ta informacija ne vrijedi upravo ničemu, ni to nije potrebno posebno isticati, tako da ni ja neću o njoj polemizirati ni davati joj legalitet ni bilo kakvu profesionalnu pažnju. Smatram da je ovakva vrsta informacije kakva je nama vijećnicima dostavljena, jasna poruka upravnih odbora javnih preduzeća da ćemo progutati sve što nam se servira. Naglasio bih da postoji jasna razlika između izjave što ovaj dokument ustvari jeste i dokaza o transparentnom poslovanju, odnosno zvanične dokumentacije. Nije mi jasno zbog čega je u informaciji tretirano, znači plate radnika, mi to nismo tražili s obzirom da su te plate četiri puta manje u odnosu na plate direktora. Nije mi ni jasno kako niko od upravnih odbora ili članova upravnih odbora nije rekao, hajte ljudi stanite ovdje je puno novca. Pet hiljada KM je plata predsjednika države. Naprotiv, ovi upravni odbori su aminovali visoke plate rukovodilaca i direktora, vodeći se možda i vlastitim naknadama. Dalje ću se osvrnuti na razloge ovakvog ponašanja menadžmenta i upravnih odbora te pokušati pojasniti razloge i ponašanje. Shvatio sam naime, da pritisak upravo na upravne odbore da javno prikažu svoj rad ili nerad, ustvari nije liječenje uzroka već liječenje posljedica. Problem očigledno leži u drugim stranama, odnosno na drugoj strani. Nesporna je činjenica da upravne odbore imenuje postojeća vijećnička većina, odnosno postavlja one ljude koji dolaze iz političkih opcija koje čine vijećničku većinu. Ti kadrovi koji su imenovani u upravne odbore imenuju direktore, a većina u Općinskom vijeću to potvrđuje. Direktori i upravni odbori upravljaju preduzećima, ali izgleda niko nije objasnio da je Općinsko vijeće povjerilo direktoru javnog preduzeća da ekonomično i rentabilno posluje, te da se domaćinski odnosi prema imovini, a ne da raspolaže kao svojim vlasništvom. Prema tome dolazi se do jednog zaključka da za ovakve stvari odgovorni smo mi, odnosno odgovorno je Općinsko vijeće, ili preciznije ako hoćete, vijećnička većina u Općinskom vijeću, SDP, SBB, SDU, vijećnici BPS-a, odnosno Stranke za BiH, nezavisni vijećnici ili kako već. Potpuno je jasno da ova vijećnička većina nema dovoljan politički potencijal da se uhvati u koštac sa uvođenjem ekonomičnog poslovanja u javnom sektoru ali vjerovatno i sa ostalim problemima jer kako drugačije objasniti ovo ponašanje. Povrh toga postojanje nedovoljnog političkog kapaciteta dodatno

uslovljava novim političkim momentima kao što je nedavno proglašeno istupanje BPS-a iz koalicije sa SDP-om, SBB-om i SDU. Molim vas gospodo, ko danas uopće čini političku većinu? Ko donosi odluke i preuzima odgovornost? Da vam pravo kažem ni meni nije jasno. Ovde su nejasne fundamentalne političke stvari koje su osnov funkcionisanja. Kapacitet nije dovoljno jasan, a mi smo tu da rješavamo krucijalne, životne i egzistencijalne probleme. Ono što je još meni jasno kao dan, jeste da pred ovom vijećničkom većinom predstoji imperativ stabilizacije političkih prilika, odmjeravanje kapaciteta i uvođenje prijeko potrebne promjene. Ukoliko se ne urade, suočit ćemo se sa još većim problemima, onda neka nam je Bog na pomoći. Umjesto da rješavamo probleme vezano za funkcionisanje ekonomije na općini, morat ćemo se vratiti na definisanje političkog kapaciteta Općinskog vijeća, što je gubitak dragocjenog vremena. Pokušaj maskiranja isplata, ja to doživljam tako, javnih prduzeća što je samo posljedica političke destabilizacije jasan je indikator da je SDA dirnula u srž problema. Posljedice dešavanja ovih nagomilanih problema u javnom sektoru će biti teške i bolne za pojedince, ali što se prije počne rješavati prije će se pronaći izlaz iz ove krize. Treba da nam bude jasno da više niko nema političku zaštitu i da temeljem iste više ne može raditi šta mu je volja. Narod je ogorčen nepotizmom, upošljavanjem preko veze, korupcijom, ogorčen je bahatošću i letargičnim odnosom spram ljudskih sudbina. Poruka naroda je upućena nama. Mi smo od tog istog naroda izabrani da zastupamo i branimo njegove interese. Interes naroda gospodo, a ne pojedinaca. Mislim da je krajnje vrijeme da to shvatimo, ukoliko već nismo. Pravi put rješavanja problema i izlaska iz krize jeste stabilizacija političkih prilika na općini, davanje legaliteta onim strankama koje stvarno imaju kapacitet da se uhvate u koštac sa ovim stvarima. Rebalans budžeta i smanjenje kapitalnih izdataka te povećanje socijalnih transfera, pomoć mladima, preduzećima, odnosno investicijama. Zatim izrada strategije samozapošljavanja i pokušaj ublažavanja nezaposlenih kroz ovaj vid zapošljavanja. Izrada strategije poljoprivredne proizvodnje i poticaja, omogućavanja i privlačenje investicija po bilo kojoj cijeni kroz intenzivan rad na ostvarivanju svih administrativnih prepreka, što se već i radi. Konglomeracija javnog sektora s aspekta upravljanja i regulisanja pojedinih upravnih odbora u javnim preduzećima sa jasnim ciljevima. Za sve ove stvari treba politički koncenzus i stručni kadar koji će sve ovo voditi. Nažalost toga danas nemamo. Stoga, ukoliko postoji volja da se ublaže svi socijalno-ekonomski problemi naše zajednice, barem djelimično, trebalo bi poći upravo s te pozicije jer sve ostalo je bespredmetno. Takođe, upoznat sam i sa zaključcima prije ove sjednice od strane Puškara koji je prisustvovao Kolegiju vijeća i koji nas je informisao na klubu. Oni su po mom nekakvom sudu prilično naivni. Između ostalog, tim zaključcima se nalaže da u određenom roku nadzorni odbori koriguju plate uprave i svedu na realni nivo. Ovo meni izgleda kao da je Općinsko vijeće učiteljica koja je uhvatila dijete u školi kako nije napisalo zadaću i daje mu za kaznu da se popravi. Podsjećam vas da ovo nije škola jer u upravnim odborima nisu djeca. To su ljudi koji moraju raditi. Da su radili svoj posao čini mi se da mi ne bi morali rješavati probleme javnog sektora. Na kraju svog izlaganja vratio bih se ponovo na pitanje naših preduzeća i njihovih uprava sa jednim prijedlogom, odnosno zahtjevom kojeg i podnosim u ime Kluba vijećnika SDA. Naime, menadžment i uprave javnih preduzeća nisu dostavili dokumente iz kojih se nedvosmisleno vide stvarne i cjelokupne naknade direktorima i upravnim odborima. Iznose plate radnika nismo ni tražili niti je to kome padalo na pamet. Budući da nismo dobili podatke koje smo tražili i zbog toga ne možemo donijeti valjane zaključke, a to bi se sve skupa moglo protumačiti kao pokušaj obmanjivanja Općinskog vijeća. Klub vijećnika SDA umjesto vijećničke većine traži da Općinsko vijeće stavi još jednu odluku na dnevni red koja je logična i koja rješava pitanje javnih preduzeća. Odluka se odnosi na izglasavanje nepovjerenja svim upravnim odborima svih javnih preduzeća, a samim tim i smjenu svih direktora. Odlukom bi se imenovali vršiooci dužnosti što je zakonski propisano, a Općinsko vijeće bi tražilo da u javna preduzeća uđe državna revizija kako bi se u konačnici dobila prava predstava o stanju u javnom sektoru naše općine. Toliko, hvala”.

Mujo Hasić:

“Ja sam očekivao da će kolega Omerdić ovdje izaći pa reći nešto konkretno oko ove informacije, vezano za plate u javnim zdravstvenim ustanovama, vijećničke naknade i plate načelnika i uposlenika Općine. Međutim, on je nama ovdje održao politički govor, šta bi trebalo da se radi i dešava i kako bi to trebalo. Nije uopće upitna vijećnička većina i to se vidi prilikom

glasanja da li je ima ili ne, i ko je čini. To apsolutno nije ni bitno kod ovog. Jednostavno sam očekivao nešto konkretnije. Ali da pojasnim jednu stvar koja je daleko gora za nas sve pa i čitavu BiH, a to je rad na crno. Ja sam nešto malo komunicirao sa svojim kolegama i pitao u neformalnom razgovoru koliko on pretpostavlja da ima radnika koji rade na crno na općini Gračanica. I došli smo do neke minimalne cifre od 500 radnika koji rade na crno. Neki kažu da možda ima i više. Znači 500 radnika da je prijavljeno na minimalni lični dohodak po 372,00 KM, po osnovu toga državi treba platiti oko 270,00 KM raznih poreza i doprinosa. Ako to pomnožimo sa 500, pa puta dvanaest mjeseci, na području općine Gračanica dolazimo do cifre od 1.620.000,00 KM. A puta deset godina, znači to je šesnaest miliona. Ako pretpostavim da u Federaciji BiH postoji najmanje 50 sredina sa istim brojem radnika na crno, dolazimo do frapantne činjenice od osamsto deset miliona maraka za deset godina samo po osnovu toga što su radnici neprijavljeni i nisu uplaćene stope doprinosa i poreza na njih. To je konkretan podatak. Što se tiče plata uposlenika i uprave JZU i u drugim ustanovama ne kažem da nisu velike, jesu. Znači imamo mi rezerve. Najveći broj, nešto što se može odraziti to je ušteda u Općinskom vijeću i ta ušteda će konkretno biti plasirana na neke druge stvari, a to su socijalne kategorije, narodna kuhinja i ostale neke druge stvari. Da ne govorim o nekim drugim stvarima jer mi imamo daleko krupnijih stvari od toga da li je plata četiri ili pet hiljada. Ima ušteda na bezbrojnim mjestima koje se mogu napraviti. A ovo sam naveo jer su krivi i radnici, krivi su radnici koji pristaju da rade na crno, da bi eventualno primali sa zavoda za zapošljavanje 100,00 ili 150,00 KM i platu ovamo. Ja sam vrlo često ovdje za govornicom pomenuo da kod nas jednostavno u primarnoj zdravstvenoj zaštiti mora biti omogućeno svim građanima BiH, bez obzira na starosnu dob, zaposlen ili nezaposlen. Time ćemo smanjiti eventualno gužvu na Zavodu za zapošljavanje, time ćemo smanjiti i broj nezaposlenih. I da napomenem još broj zaposlenih se povećava, a isto tako se povećava i broj nezaposlenih prilivom radnika iz inostranstva ili prilikom završene srednje škole.”

Himzo Avdić:

“Stavio bih repliku kolegi Omerdiću jer nas je prozvao. Ja sam predsjednik Kluba vijećnika BPS-a i sada, a ne kako reče da smo tamo u nekoj stranci za BiH i nezavisni vijećnici. Bit ćete vi blagovremeno obaviješteni kad mi pređemo u neku drugu stranku ili kad budemo nezavisni vijećnici. Malo bih sugerisao predsjedavajućem, jer mi se čini da su se kolege Hasić i Omerdić odaljili od stavova Kolegija i od dnevnog reda. Prema tome da ne navodimo detalje, da ne pričamo o radu na crno jer to nije u sklopu ove tačke dnevnog reda, što je prezentovao kolega Hasić i što je kolega Omerdić prezentovao neke stvari koje nisu u dnevnom redu apsolutno. Zato predsjedavajući molim da se poštuje dnevni red i stav Kolegija, a ako treba dodati neku tačku dnevnog reda, tražit će se pauza pa da se to učini”.

Vehid Osmanović:

“Drago mi je da sam se sada naučio, u principu neke stvari nisam znao jer Mirza Omerdić mi je otvorio oči. Kao da smo mi ovdje toliko naivni da ne znamo probleme u ovoj državi i u ovom društvu. Obzirom da je ovdje puno gostiju iz Plenuma itd. ja ću se kasnije oglasiti odgovorom na ove zahtjeve Plenuma i opštu situaciju u društvu. Ovaj puta ću se držati dnevnog reda i reći, Klub vijećnika SDP-a podržava stavove Kolegija vezano za ovu prvu tačku o visinama plaća i naknadama nadzornim odborima i upravama u javnom sektoru na općini Gračanica. Ali ću se ponovo javiti kad se odtovir tema o zahtjevima građana.”

Hasan Puškar:

“Mujo kaže Mirza drži predavanje, nemoj ti nama da držiš predavanje, a statistika je ionako skup netačnih podataka. A ti da si htio da mi kao Vijeće imamo neki stav ti bi sazvaio Komisiju za budžet, pa da mi iznesemo ovdje konkretno uštede kao Vijeće, kao Općina. A sada ću u ime kluba predložiti jedan konkretan prijedlog uštede budžeta. Pošto vidim da ste se počeli ovdje igrati malo politike, predložiti ću konkretno uštede i što se tiče paušala i ideje itd. Prije nego predložim konkretno, morat ću ovdje prisutne podsjetiti na neke prethodne odluke koje je Općinsko vijeće donijelo u nekim proteklim godinama. 2009. godine Općinsko vijeće donijelo jednoglasno Odluku o smanjenju vijećničkih paušala čime je ušteda na godišnjem nivou bila oko 35.000,00 KM. A

donešena je odluka da se broj stipendija poveća za pomenuti iznos. Znači donešena je odluka koja nijedne godine nije ispoštovana. Od 2009. godine nisam vidio da je ikad povećan broj stipendija za toliki iznos. Pod broj dva, ovo je sada direktno nanešena šteta budžetu, 2010. godine, parlamentarna većina na čelu sa SDP-om izvršila je nezakonitu smjenu predsjedavajućeg Općinskog vijeća Muharema Musića. Na mjesto predsjedavajućeg postavljen je Edin Ibrišević. SDA je tada reagovala, govoreći da je smjena nezakonita, ali parlamentarna većina je tvrdila da je smjena po zakonu, zajedno sa pravnicima i općinskim pravobraniocem. Dalje, SDA je bila u pravu jer je došlo na naplatu, jer je tužba Musića usvojena i ja raspolazem sa informacijom da je to oko 65.000,00 KM iz budžeta za 2014. godinu. Znači sad ja predlažem uštedu u budžetu, da se parlamentarnoj većini SDP-a, znam da je i Naša stranka glasala, SDU i ne znam da li je još koja glasala, obustave isplate vijećničkih naknada, takođe općinskom pravobranioocu jer je on tad aminovao, a i ostalim pravnicima koji su to aminovali. I time bi znači konkretno imali uštedu od 65.000,00 KM. Istu smo stvar napravili 2013. godine sa imenovanjem upravnih, nadzornih odbora u Vodovodu i Komusu, sa izmjenom Statuta a sudski postupak je bio u toku. Sad se ispostavilo pravosnažnom sudskom odlukom da je ponovo vraćena privatizacija i kapital preduzećima. Moglo se čekati da se postupak završi pa tek onda da se postavi nadzorni i upravni odbori, direktori itd. Što se tiče ovog općinskog vijeća i rada u Općinskom vijeću, ja lično smatram da općinskim vijećnicima koji se zalažu u radu Općinskog vijeća, koji se uključuju u diskusiju, predlažu konkretna i konstruktivna rješenja i sl. ne treba zadržati postojeće paušale nego ih povećati. Određenim vijećnicima, a nas kolege ovdje 50% ima, možda i više u Općinskom vijeću, koji su ti i ja ih zovem dizači ruku, poslušnici svojih partija, ucjenjivači izvršne vlasti, oko postavljanja direktora i nadzornih odbora govoreći, načelnice mi tebi nećemo ovo ili ono, ako postavite našeg. To za mene nisu nikakvi političari. Njih treba da bude stid da uzmu i jednu jedinu marku naknade za vijećnički paušal, a ti dobro znaju ko su ovdje. Toliko za sada.”

Za diskusiju se javila Jasminka Imširović, općinski pravobranilac:

“Ja sam se morala javiti jer je vijećnik Hasan Puškar potpuno neosnovano i neistinito, vezano za smjenjivanje Musića spomenuo moje ime. Zapisnici postoje, a ni jednom riječju vezano za smjenu Musića općinski pravobranilac nije davao mišljenja niti je neko tražio to od općinskog pravobranioca. Općinski pravobranilac u skladu sa svojim nadležnostima preuzima pravne radnje na sudu i pred drugim organima. I još uvijek bih rekla, donesena je samo prvostepena presuda i po žalbi predmet se nalazi pred drugostepenim sudom. Pošto ide u javnost, Jasminka Imširović općinski pravobranilac nikada nije davala nikakvo mišljenje vezano za smjenu Musića, niti je glasala niti ima pravo glasa.”

Hasan Puškar:

“Ja sam mislio u kontekstu javna preduzeća i smjena Musića. Traženo je mišljenje i tamo i ovamo i rečeno je da je sve to po zakonu. Za ovom govornicom, načelnik nije bio tu, Vi ste zastupali njega. Nastavljamo dalje, da završim.”

Safet Pjanić:

“Htio bih da kažem, prije svega kao vijećnik, par riječi vezano za ovaj dnevni red i zamolio bih sve vijećnike ubuduće da se zaista držimo dnevnog reda jer je ovo vanredna sjednica i radi se o vrlo važnim pitanjima. Javio sam se za riječ iz razloga, prije svega, što dolazim iz firme koja zaista vodi jednu tešku bitku za život i za preživljavanje gdje radimo sto posto poslove, što se kaže i jedva sastavljamo kraj s krajem, a svaki mjesec dana državi ide 110.000,00 KM doprinosa. Malo je takvih na općini koji toliko plate svaki mjesec, neka se javi ko toliko da para. Ne možemo zaista da damo radniku ni marku veću platu jer to sve ostvarujemo izvozom, gdje su cijene u centima. Administracija je narasla za 80.000 radnika u javnom sektoru. To nema ni jedna privredna grana i nalazimo se u dobokoj ekonomskoj krizi. Država kad je u krizi, firma kad je u krizi, osnovno pravilo je da se odriču tzv. luksuznih troškova. I to treba i ovdje govoriti. Niko ne govori o platama, ali postoje tzv. luksuzni troškovi koji nisu prilagođeni trenutku i zaista ih treba svesti na najmanju moguću mjeru, a ako imate morala iole, ukinuti ih. Ja sam dobio podatke iz porezne uprave i ovdje ima plata i po šest, sedam hiljada KM itd. I govoriti o vijećničkom paušalu od 400,00 KM, što neko reče da je prijedlog građana, je suviše zaista. Ima mnogo drugih stvari osim tih 400,00 KM kada

vijećnik treba da obuče odijelo, kravatu, čarape itd. prisustvuje sjednici i da radi, te odgovara ovoj zajednici za svoj rad i zato ga ne treba amortizirati. Ali evo dogovor je bio, zaključci postoje i ja ih apsolutno prihvatam. Udruženje poslodavaca Tuzlanskog kantona je u više navrata u zadnjih mjesec dana sjedalo i donijelo par mjera ekonomske politike i ko ih je čitao ima dosta dobrih stvari i to treba aposlutno preslikati i prepisati i na našu Općinu. Uglavnom se govorilo o uštedama. Ja sam govoro prije 4-5 godina premijeru da će doći dan kada će morati smanjiti sebi platu, pa svima ispod sebe. Ja kao privrednik, kad mi je manja proizvodnja smanjujem plate režiji. Ovdje bih predložio samo par stvari. Prva stvar je regres kojeg naša općina isplaćuje. Isplaćuju sve ustanove sem BKC-a i Obdaništa. Regres tretira opšti kolektivni ugovor i kaže se da se isplati ukoliko firma nema gubitak u tom i tom periodu itd. Ali ovo ne da su gubici, ovo su pogubne stvari i nema govora o tom luksuznom trošku. I ja sam za to da se apsolutno regres ukine. Dalje, kad je u pitanju topli obrok, neke ustanove imaju 7,00 KM, jedne 200,00 KM, jedne 6,00 KM, jedne 13,50 KM itd. Treba donijeti jedinstvenu odluku o toplom obroku. Ne može biti u jednoj ustanovi sedam, a trinaset i po u apotekama. To su nakaradne odluke i to ne valja ništa. Radnik treba da jede, ali ne mora jesti za 13,50 jer za 5,00 KM može i nije pogubno. Prevoz radnika, i na tome se može napraviti ušteta. Znači sve te stvari treba izdefinisati. Nisam da se smanjuje plata, apriori, ali treba stegnuti kaiš svako. Ovo je duboka kriza i mora podnijeti krizu svako. A udar je na javnim preduzećima i ustanovama. Ne mora radnik u Elektroposlovnici imati 1.500,00 KM, a moj radnik 300,00 KM koji je isto VK, ali je kažnjen što radi u Fortuni. To ja kao čovjek nikad ne mogu prihvatiti, ni kao privrednik i umrijet ću a s tim se neću složiti. Rekao sam smanjite plate u javnim preduzećima, povećajte dobit. Najveći trošak u poslovanju je plata. I dajte to u socijalne svrhe, u ekonomske, u razvojne. U nas u budžetu samo su plate, nigdje nema sporta, kulture, a da ne govorimo o privredi. I dokle tako više imati takve budžeta. S tim treba stati gospodo, mislim da nije moralno. Nije moralno da ima direktor platu u bolnici, evo čovjek sjedi ovdje 6.500,00 KM. Nije moralno, ja imam 2.000,00 KM, kao direktor koji ima 1.300 radnika. Nije moralno i doći će i moji radnici da izraze nezadovoljstvo i tu sam nemoćan. Luksuzne troškove treba sve srezati i dovesti na razumnu mjeru.”

Said Gazhibegović, direktor JZU Opća bolnica “Dr. Mustafa Beganović” Gračanica je replicirao:

“Pošto sam prozvan ovdje, a htio sam svakako nešto da kažem. Za radi istine da ljudi znaju, po mom dolasku ja sam tražio, pošto je ugovorena plata sa menadžmentom da mi se plata obračunava isto kao mom prethodniku, što je ispoštovano. Znači neki drugi upravni odbor i nekom drugom direktoru donio je način obračuna plate. To je istina. Ja sam došao sa plate 5.000,00 mjesečno. To možete provjeriti, uzmite za 2009. i 2010. godine izvod, slobodno. Dalje, hoću još da vam kažem da nemate koga smjenjivati, ja sam već podnio ostavku iz nekih drugih razloga, znači nevezano za ovu situaciju. Takođe upravne odbore ne možete smjenjivati jer je mandat istekao. Tako da ne znam u šta se upuštate. Dalje hoću da vam kažem, već spominjete sudske presude za nezakonito smjenjivanje ljudi i smanjivanje plaća. To su menadžmentski ugovori i vi ne možete ni na koji način, nije vaša nadležnost da smanjujete plate, da mijenjate kolektivni ugovor, da mijenjate menadžmentske ugovore jer ćete se suočiti sa sudskim procesom. Možda i nećete, ne znam. Ali postoji opasnost da ćete se suočiti sa sudskim procesima. Dalje hoću da vam kažem, plata jednog specijaliste kod mene u bolici dođe do 3.500,00 KM sa dežurstvima i pripravnošću. Ko će njemu biti direktor sa 2.400,00 KM? Je li mislite da će se neko javiti za tu poziciju i nositi tu odgovornost? Ne vjerujem. Dalje, gospodin koji me prozvao, je li misli da je isto šivati cipele i ljude? Je li to ista odgovornost? A neka mi kaže kako toliko pije i toliko jagnjadi pojede za 1.000,00 KM? Zahvaljujem se”.

Safet Pjanić:

“Ja sam otprilike ovako rekao, da je ovo kriza i pitam se je li moralno da se ima plata 6.200,00 KM? Je li moralno? Ako je moralno, halal ti vjera. Ali ovdje u Informaciji kaže da direktorova plata se odnosi na rad u prosjeku 470 radnih sati mjesečno, redovan rad, priprevnost i dežura. Je li čovjek može raditi tri mjeseca u mjesecu, ode mu zdravlje. A što ja jedem jagnjad, jedem svoja jer imam 25 ovaca u stadu, a ko to ne zna neka dođe da mu pokažem gdje su ovce i malo jedem koliko imam jagnjadi”.

Hasan Puškar:

“Ovo je pitanje. Ako ovako svi smatraju da mi po zakonu ne možemo niti koga smijeniti, ni menadžment kojeg smo mi postavili, a sa radnicima i kolektivnim ugovorima mi nemamo ništa, koja je onda svrha ove današnje sjednice? Koja je svrha ako mi nikog ne možemo kazniti za njegov nerad ili nagraditi za njegov rad? Znači nema svrhe što se nas danas stotina sabralo ovdje. To je broj jedan. A broj dva, u mom praćenju situacije u dva mjeseca unazad, ja nisam vidio na protestima, na plenumu i slično ni jednog jedinog radnika iz javnog preduzeća. Svi što traže po plenumima i tome slično svi što hoće da se zaposle, dame i gospodo hoće u ovih pet listova ovdje. Svi hoće javna preduzeća. Još nikad nisam čuo da je neko tražio da se zaposli u Fortuni. Da odemo u Olimp, da odemo Širbegoviću, da odemo u Variplast Muji, što je privatni sektor, svi hoće u javni sektor. Nažalost je to, a nažalost vidim ovdje i zašto. Znači moje je pitanje, ukoliko mi ne možemo nikoga kazniti ili nagraditi za njegov rad, koja je svrga današnje sjednice ovdje?”

Mirza Omerdić:

“Evo kolega Pjanić je rekao i pravilno vlada ovom situacijom. Znači to je kriza. Mene su učili kada kriza dođe u preduzećima, oni koji moraju ići su rukovodioci, jer su oni doveli do toga. A s druge strane htio bih replicirati kolegi iz SDP-a. Nisam vam ja otvorio oči. Svima nama je narod otvorio oči. Ja vas samo podsjećam šta biste trebali uraditi da ovi procesi krenu naprijed. Imamo mi konkretne prijedloge. Mi imamo oružje unutar budžeta, imamo kapitalne izdatke. Ukoliko je kriza mi moramo izvršiti rebalans budžeta. Smanjiti kapitalne izdatke, povećati transfere, socijalna davanja. Međutim, mi to ne možemo uraditi, nemamo političkog kapaciteta, a ko to ne vidi, ja mislim da se gaje iluzije i ne može se bilo šta riješiti. Na vama je gospodo da razriješite ovu situaciju.”

Sead Gazibegović:

“Ja bih ukratko samo zamolio kolege, svi koji izađu, nadam se da neću i ja takav biti, kažu dajte da se držimo dnevnog reda i onda raspale politički govor i predizbornu kampanju. Sve je ovo lijepo slušati. Narod to voli slušati. Situacija jeste takva kakva jeste, tu nikakve diskusije nema, ali ja sam mislio da bar oni koji su u Općinskom vijeću znaju šta su nadležnosti Općinskog vijeća i o čemu mi treba da diskutujemo. Znači, imamo zaključke i o tome treba da diskutujemo, uvažavajući ovo što je Mirza rekao, mi smo oni koji uslovno rečeno, sa načelnikom naravno, kojima usvajamo budžet. I da vidimo šta mi tu možemo uraditi. Sve ove druge silne priče uključujući i ove ovce i ovu jagnjad, to nema veze sa ovim i molio bih ubuduće ko izađe ovdje da ima u vidu da sjedimo i mi i da nismo ovce. Ja sam pogledao tu informaciju o platama i za mene tamo nema ništa sporno. Ako govorimo o visinama plate to su tri plate i tolika se frka digla oko rasipništva u javnim preduzećima, a onda svi kažu vidite plate, SSS 600,00 KM, ljekar opšte prakse 1.200,00 KM. Ako je to velika plata, ja ne znam šta je mala plata. Zamolio bih vas znači da vidimo oko ovih zaključaka i ono što mi zbilja možemo doprinijeti da se uštede naprave. Paušala što se tiče, evo ima prijedlog i podsjećam da smo mi prvo vijeće, a ovo govorim zbog gospode iz Plenuma, prvo i jedino vijeće dok nisu nastale ove frke, koje je smanjilo paušale i zaustavilo rast paušala. I sa ovim smanjenjem vjerovatno ćemo biti na pretposljednem mjestu. Stoji otvoreno sve.”

Fadil Mešić:

“Mi smo danas na proširenom kolegiju Općinskog vijeća donijeli pet zaključaka kod kojih smo svi bili za. Čini mi se da je na kraju Puškar napustio ili je tražio dodatne konsultacije sa Klubom SDA. I bili smo svi kod ovog da ćemo podržati i ima za smanjenja itekako. Zaboravio sam prethodno da kažem da je SDA, SDP već krenula u predizbornu kampanju, pa čestitam. A predsjedavajući neće ni da opomene, a kamoli da oduzme riječ. Valjda ne smije. Logično da i ne smije. Dalje, treba se pridržavati tačke dnevnog reda. Pravit ćemo i neke usporedbe jer moramo ih praviti. Recimo, neobjašnjivo je da šefovi u Općini, neka se ne ljute jer imaju plaće te koje su navedene, imaju veće plate od ljekara specijalista u bolnici. Ovo ne branim nikoga. Ako nastavimo ovako smanjivati, a njima povećavati, onda će nam ljekari otići. Nije ovo dodvoravanje, opet kažem, ovih pet zaključaka koje predlažemo ja ću glasati “ZA” jer ovdje ima ušteda. Smanjili smo i vijećničke paušale za 50%, a Plenum vjerovatno traži ukidanje skroz, da ništa nemamo. Gospodo vijćnici morate znati da da je zdravstvo specifična društvena djelatnost i da se ona ne može mjeriti

sa ostalim društvenim djelatnostima kao što je komunalno, vodovod i tako slično. Primjera radi recimo, a to su informacije koje su dostupne, radnik ima 710,00 KM platu, dok medicinska sestra u bolnici ima 650,00 KM. To je istina, to ja ne izmišljam, piše ovdje. Jedna kompanija prije godinu dana u Hrvatskoj se vodila za smanjenje dežurstava u JZU, a vidim iz SDA se smiju, a znam zašto. Vodila se da se ukinu dežurstva pripravnosti pa su vidjeli da to ne ide, pa su ponovo vratili prije deset-petnaest dana. Ja se držim dnevnog reda. Toliko za sada.”

Esad Tursunović:

“Ne mogu Fadile stvarno tebe slušati više. Ni jedan konkretan prijedlog nikad nisi iznio. Samo izlaziš kako vjetar puše. Cijeli život si parazit. Zašto nisi ušao, ušao si tu u vijeće i dobio si posao u bolnici zbog vijeća. Dosta više, iznesi probleme bolnice. I svi i jedan koji radi u javnom sektoru, iznesite probleme. Ja sam u privrdi i kakve poteškoće imam i kako vidim ovo su sve male plate Fadile, treba ljudima povećat.”

Fadil Mešić:

“Ne znam čime je moja diskusija izazvala ovako ponašanje vijećnika. Kada su bolesnici na hemodijalizi štrajkovali i upozoravali što se tamo Vijeće nije uključilo. Načelnik jeste, ni njemu se ne dodvoravam, jer ja glasove zaradim sam sebi. Evo konkretno zašto. Danas smo evo predložili na Kolegiju Općinskog vijeća pet zaključaka za šta ćemo se izjasniti danas. Smanjene su plate direktorima evo, ali ćemo i ostati bez njih, a vi ste krivi.”

Vehid Osmanović:

“Ja bih vas zamolio da mi prekinemo ovu političku diskusiju i borbu za neke političke poene. Prije svega, ovo općinsko vijeće je jednoglasno usvojilo budžet. Prema tome imali smo tad priliku da povećamo socijalno stanje, ali tad nije bilo protesta i nismo to uradili. Znači sad imamo rebalans pa ćemo vidjeti šta ćemo napraviti. Drugo, mi optužujemo ustanove naše koje su najbolje na kantonu. Mi smo jednoglasno usvojili sve njihove izvještaje o radu za prošlu godinu. I ovdje za ovom govornicom sam i ja, a i vi svi hvalili sve naše JZU i JU i da sada mi njih toliko kritikujemo nema nikakve potreba. Da mogu ja bih platu Dječijem obdaništu sada podigao. Plate nisu prevelike, ali situacija koja je trenutno ekonomska, daje nam za pravo da idemo na maksimalne uštede tamo gdje možemo. Hajde da se usmjerimo samo na ovo što smo tražili. Tražili smo izvještaje, dobili ih i tu nema nekih velikih odskakanja. Meni su veća odskakanja u toplim obrocima i regresima koji nisu ujednačeni. Plate niko i ne spominje, plate se regulišu kolektivnih ugovorima i ko smo mi da ovdje utičemo na pojedine plate. Ovo vijeće nije nadležno da mijenja kolektivne ugovore. Da skratimo diskusiju, imamo zaključke Kolegija i da se o istim izjašnjavamo, a u drugom dijelu sjednice treba da odgovorimo za zahtjeva građana.”

Safet Pjanić:

“Ovdje Vehide niko ne ubire političke poene, ni članovi SDP-a, ni SDA. Ja govorim kao privrednik i dvadeset i pet godina sam direktor. Znam dobro šta je kriza i znam dobro principe ekonomije. I nemoj se dodvoravati nikome. Ti si ovdje izašao i ti bereš političke poene. Rekao si da je plata direktora u Obdaništu 1.100,00 KM. Je li to plata direktora, a u Vodovodu 2.900,00 KM direktoru, a tehničkom 1.800,00 KM. Njih dvojica pola Vijeća, što to nisi rekao Vehide. Plate treba da se prilagode na trenutak u kojem živimo. Ja smatram da je to previsoko i to je moje mišljenje. Ja se nikom ne dodvoravam i ne berem političke polene. Član sam BPS-a do sutra, sutra i to nisam. Gdje ću biti, boga pitaj. To mi ne treba.”

Na prijedlog Avdić Himze, predsjednika Kluba BPS-a data je pauza.

Nakon pauze Edin Ibrišević, predsjedavajući Vijeća je otvorio diskusiju naglašavajući da je nastavku sjednice prisutan i poslanik u Skupštini TK Džemal Jukan, a potom dao riječ Šuša Larisi, predstavniku Plenuma Gračnice.

“Kao što vidite Larisa će se za razliku od mojih prethodnika obratiti sa jednim velikim osmijehom jer kako vidim da se ovdje situacija zahuktava i ide pravom smjeru.

Vječito pitanje šta je i ko je Plenum?

Plenumi su najznačajniji rezultat protesta koji su nam se desili i dalje se dešavaju širom BIH. Plenumi predstavljaju legitiman način izražavanja volje građana demokratskim putem u vrijeme ove krizne situacije koja se slobodno može nazvati socijalnim buntom naroda .

Plenum nema ingerencije za promjene određenih zakona, odredbi niti direktno može mijenjati bilo šta u izvršnoj ili zakonodavnoj vlasti. Plenumi funkcionišu kao instanca usmjeravanja i artikulacije različitih društvenih interesa, odnosno kao mehanizam ukazivanja na trenutne društvene protivrječnosti i probleme. Plenumi su korektivni vlasti koji će svaki uočeni problem uskladiti sa opštim interesom i napretkom sa ciljem da se svakom od nas obezbijedi bolje sutra jer svaki čovjek je odgovoran za svoj život, a čovjekom može biti samo onda kada je spreman boriti se i istrajati u borbi za svoju slobodu i osnovna ljudska prava, a nikako onda kad je svoju slobodu spreman bez borbe ustupiti.

Plenumi svakim danom postaju vrlo ozbiljno tijelo kako na općinskoj, kantonalnoj, entitetskoj, pa čak i na državnoj razini ukoliko nastave da se razvijaju i da kontinuirano djeluju kao do sada. Bez obzira što je u ovom trenutku znatno manji broj plenumaša naspram velikog broja glasača, ne znači da plenumi nisu opravdani i utemeljeni jer ista ova demokratija koju danas živimo garantuje i dozvoljava udruživanje građana i njihovo učešće u političkom životu zajednice uz uslov da se poštuju demokratska načela, a na tim istim načelima plenumi djeluju od samog početka.

A na koncu i plenumaši su vaše biračko tijelo. Mi smo građani koji su vas izabrali na „Građanskim izborima“. Mi smo i građani koji vas predstavnike izvršne i zakonodavne vlasti pozivamo na ličnu, političku i građansku odgovornost. Mi smo svi građani ... koji su nezadovoljni trenutnim radom zakonodavne i izvršne vlasti na lokalnom i svim ostalim nivoima. Mi smo Plenum Gračanice skupina malih-velikih ljudi koja nemože i ne želi više samo posmatrati... korupciju, nepotizam, nepravdu i opštu apatiju koja je budimo barem za trenutak iskreni i priznajmo sami sebi vrlo prisutna u našoj društvenoj zajednici.

Mi ... Plenum Gračanice smo građani koji su vam dali tu privilegiju da nas zastupate. Mi građani smo vam dali legalitet i legitimitet da obavljate funkcije u izvršnoj i zakonodavnoj vlasti...Nisu to učinile političke opcije iz kojih dolazite. Svi vi i da maknete u stranu partijske ili stranačke akreditacije i dalje ste legitimni predstavnici svojih građana. I dalje ste zakonski obavezni da slušate volju svojih građana i ispunjavate njihove ciljeve. I zato vas pozivamo da Plenum Gračanice shvatite vrlo ozbiljno i dobronamjerno. Vrlo smo svjesni težine upućenih prvih 15 zahtjeva na vašu adresu. Vrlo smo svjesni da ćemo na veliku većinu istih dobiti dobro poznati odgovor „Nije u našoj nadležnosti“. Iako imamo već pripremljen plan naših budućih koraka zakonski utemeljenih, još jedanput u interesu svih nas ukazujemo da nas shvatite vrlo ozbiljno. Dobro nam je poznato da nije sve u nadležnosti općinskih institucija, ali zato imamo vas, predstavnike zakonodavne i izvršne vlasti koji su dužni da nas građane Općine Gračanica zastupaju i za naše ciljeve i interese da se bore na svim instancama vlasti.

Pogledali smo i materijale i štire informacije dobivene iz kabineta Općinskog načelnika. Danas nemamo namjeru kritički se osvrtnati na sadržaj istih, te na ovom sazivu vijeća definisati kompletnost i tačnost navedenih podataka, ali vas molimo da nam po nimalo lijepom uzoru na našeg urednika lokalnog radija ne „bacate prašinu u oči“ i ne vrijeđate intelekt. Molimo vas da iduće informacije koje budete dostavljali Plenumu Gračanice vrlo stručno jasno i precizno sačinite . Jer kako se pomenuti nam urednik metaforom osvrnuo na rad Plenum Gračanice riječima i nedovršenim citatom velikog čovjeka:

Dođu, tako, vremena, kada pamet zašuti, budala progovori, a fukara se obogati!
Mi moramo reći ... nismo budale... Bila bih sretna da je Gospodin iskoristio priliku da se više pozabavi istraživačkim novinarstvom i sjeti se još po koje mudre misli poznatog nam velikana: kao npr. Čim jedna vlada osjeti potrebu da svojim građanima obećava putem plakata mir i blagostanje, treba biti na oprezu i očekivati obrnuto od toga. Izvinjavam se na možda dugom obraćanju i zahvaljujem se svima što ste smogli snage da čujete glas „Plenum Gračanice“. Ovo dugometražno obraćanje završiti ću opet riječima velikog Ive. Čudno je kako je malo potrebno da budemo sretni, i još čudnije: kako nam često baš to malo nedostaje! Učinimo zajednički da naša Gračanica ponovo bude „od posla čaršija“.

Nakon Larise Vijeću se obratio i Faruk Širbegović, predsjednik Udruženja građana “Građanska inicijativa i akcija Gračanica”:

“Ja dolazim iz one grupe ljudi koja nije stranački angažovana. Ja sam poslovan čovjek, ali kao čovjek želim da aktivno doprinesem, a doprinosio sam i do sada svojim radom prosperitetu ove sredine. Ono što mi smeta, smeta mi kvalitet života u kome žive građani, značajna većina. Ja mislim da imamo i moralno pravo, a i obavezu da učinimo sve što god je u našoj moći da poboljšamo kvalitet života ljudi. Imamo jako veliki broj nezaposlenih to sigurno dovodi do jednog vrlo značajnog broja ugroženih kategorija. Ja ću kratko i elektronski prezentirati inicijatu. Građanska inicijativa i akcija, nismo se htjeli nazvati civilna inicijativa i akcija jer bi to bilo kao CIA. Naš motiv je “Ako sam obavio dobar posao sa dobirim ciljem, moj život ima sadržaja i smisla”. Mi imamo dobar motiv, cilj, dobru namjeru da doprinesemo na jedan konstruktivan, efektivan način da nam područje općine Gračanica bude ono što jeste. Evo kratko o nama. GIA je Udruženje građana “Građanska inicijativa i akcija”. GIA je: dobrovoljno, nevladino, neprofitno udruženje osnovano radi ostvarivanja ciljeva u oblasti razvoja lokalne zajednice, GIA želi da omogući svim zainteresiranim građanima da prezentiraju vlastitu inicijativu ili akciju u stvaranju uslova za prosperitet zajednice u cjelini.

Evo ovo vijeće ima kapacitet od trideset poslanika. U Općini 115 uposlenika i 47.000 ljudi među kojima ima jako puno onih koji nisu angažovani niti u jednoj stranci i praktično nemaju priliku. A zašto se mi zalažemo, to je da se stvori prilika jednom značajnom broju ljudi koji su i obrazovani i pametni i stručni, a i kompetentni za teme da doprinesu da se otvori diskusija za određene teme i da se kroz tu diskusiju koja nije napadčeka, nije uvredljiva osim dobronamjerna, ali otvorena da se prepoznaju koje su to mogućnosti i koje su to mjere aktivnosti koje treba u saradnji sa nadležnim provesti kako bi došlo do blagostanja cijele zajednice. Znači naša misija je kroz otvoren i konstruktivan dijalog zainteresovanih strana do zajednice blagostanja. Znači, izraditi zajednicu sretnih ljudi u kojoj su građani slobodni u svakom pogledu. Imaju priliku da iskažu svoje umijeće, znanje i talenat. Ravnopravni bez obzira na stranačku i nacionalnu pripadnost, vjeru i spol. Socijalno odgovorni. Ja mislim da je jedan od ključnih razloga zapravo problem nezaposlenost. Jako puno ljudi je zapravo nezaposleno i moramo nešto da uradimo da to promijenimo. Veoma značajan dokumenat za Općinu Gračanica je Strategija razvoja lokalne zajednice i tamo je jedan od ključnih ciljeva privući investitore i povećati zaposlenost. Mislim da se trebamo suočiti sa tom analizom šta smo mi uradili na temu realizacije tog cilja i koji su efekti provođenja te strategije. S obzirom na moje zvanje, smatram se vrlo kompetentnim kad je u pitanju strateško planiranje. Znači treba da radimo analizu te strategije i da vidimo gdje smo sa njenim rezultatima. Strategija je živ dokumenat i na njemu treba stalno raditi, a isto tako i implementirati. Mislim da je to izostalo i ja kao građanin nisam zadovoljan s radom Općine. A ovo kad kažem nemojte shvatiti da ja nekog vrijeđam. Ja iznosim svoje mišljenje jer nisam zadovoljan rezultatima koji su ostvareni tom strategijom. Drugo, Strategiju treba razraditi i prilagoditi aktuelnom stanju i mogućnostima. Zatim napraviti analizu svih raspoloživih mogućnosti pristupa sredstvima kojim se podstiče zapošljavanje. U saradnji sa postojećim firmama analizirati mogućnosti dodatnog zapošljavanja u istim. I na nivou Općine i na nivou Kantona i na nivou Federacije ima mogućnosti koje koristimo, kako da potaknemo dodatno zapošljavanje. Zapošljavanje će riješiti sve ovo, a prije svega smanjiti socijalnu situaciju, odnosno smanjiti broj socijalne populacije. Što se tiče činjenice o stvarnim investitorima kod nas takvih i nema, a u nekim drugim sredinama ima. Tu se moramo suočiti sa činjenicom. Zašto u nekim drugim sredinama ima, a zašto kod nas nema. Ne treba da stavljamo glavu u pijesak i da kažemo mi smo najbolji, najpametniji itd. itd. To ne odgovara istini. Ima puno rekao bih, uspješnijih sredina i na prostoru BiH i u okolnim državama. I to je ono što mi treba da analiziramo i da se takmičimo sa

tim sredinama. Više se ovdje ne takmiči država sa državom nego grad sa gradom. Dajte da ovdje napravimo razvojnu općinu. Ja sam rođen u Gračanici i tu ću umrijeti i nije mi svejedno kako živi moja čaršija, jer se ne mogu prijatno osjećati ako vidim da oko mene ima toliko ljudi koji jako teško žive. I zato nemamo pravo da šutimo na to i zato je ova inicijativa nastala. Ona nije nastala da bih ja bio načelnik Općine ili premijer Kantona, Federacije, a uz to da kažem to mi je nužno. Ja niti to hoću da budem, niti želim da budem. Moj je cilj da kao poslovan čovjek doprinesem u skladu sa svojim mogućnostima i uz to da mobiliziram dobre ljude koji će na ovakav isti način prihvatiti i na civiliziran, konstruktivan i pametan način da prevaziđemo ovu krizu. I to da se ide na otvoren razgovor i ukazivanjem na slabost. Da završim ovaj dio koji sam započeo. Znači iz općinskog budžeta preusmjeriti sredstva u razvoj poduzetničke infrastrukture što uključuje formiranje poduzetničkih inkubatora u kojima bi se davala podrška novoosnovanim firmama. Imao sam sreću da steknem iskustva u vezi s tim šta je to poduzetnički inkubator. Ako imate inkubatorsku stanicu, umjesto pileta to je firma. U tom poduzetničkom inkubatoru odgajaju se firme tri godine. Daje im se podrška od računovodstva pa do priprema projekata. I nakon tri godine ona izlazi kao samostalna ako je sposobna, a ko ne dolazi neka druga s biznisom. Mi za to imamo i prostorne i svake druge mogućnosti. U pitanju je samo opredjeljenje, je li mi to hoćemo ili ne. Na taj način bi omogućili zapošljavanje i pomogli bi ovim ljudima koji su trenutno bez posla. Ne samo da se zaposle u nekim privatnim preduzećima nego da i sami otvore privatno preduzeće. Neminovno je da će morati doći do kresanja javnog sektora. Ja nemam ništa protiv ovih ljudi koji rade u javnom sektoru, ima tu dosta dobrih i čestitih ljudi, ali moje je mišljenje da je taj sektor preskup. Ova država ne može podnijeti toliko sektor. Npr. u Vladi Kantona radi 500 ljudi, a pitanje je koji su standardi i koliko to treba tamo ljudi da rdi. Siguran sam da će se morati uvesti evropski standardi. Znači za jednu općinu ovog kapaciteta treba utvrditi koji je to broj ljudi koji ovdje treba da radi i koliko je učešće plata uposlenika u budžetu. Evo analize plata uposlenika u Općini, ne uključujući tu BKC, Centar za socijalni rad i dr. A kad sam već pomenuo Centar za socijalni rad u budžetu je predviđeno 220.000,00 KM, a vi ste ga usvojili i da li je to u ovom trenutku dovoljno. Koliko je od tih sredstava otišlo za plate, a koliko građanima. Ja kao građanin smatram da je to malo i molim vas da kao vijeće preispitate to. Treba da se urade kriteriji i da se analizira u kakvom stanju žive ti ljudi, a ima nas 47.000. Koliko ih radi, koliko ima porodica da ne radi ni jedno. Treba uraditi socijalnu kartu, a kad se hoće puno toga se može. Mislim da se sa postojećim stanjem ne smijemo miriti. Ja sam došao ovdje da kažem, a i vas da zamolim, nemojte da više tolerišemo ovakvo stanje, jer ne znamo koliko djece sinoć nije imalo šta da jede. Napraviti ćemo tu analizu kako bismo vidjeli šta da radimo i da možda neka sredstva iz budžeta preusmjerimo i da fokus budu djeca i oni stariji koji sebi sami ne mogu pomoći. Kao i zajednica moramo reagovati i nemamo pravo na to da šutimo jer je to pitanje morala. Ja sam zato i došao ovdje, da pomognem i da saradujemo otvoreno. Ja nisam zadovoljan i to upućujem i načelniku i zaposlenim u Općini i javnom sektoru. Nisam zadovoljan sa nivoom komunikacije između Općine i građana. Moramo uvijek imati u vidu šta su efekti sastanaka i saradnje. U okviru postojeće organizacione strukture u Općini napraviti ured "one stopshop" koji će pružiti kompletnu podršku kako lokalnim tako i stranim investitorima. Analizirati iskustva drugih sredina. Neograničen je broj mogućnosti. Udruženje poslodavaca TK je za tri dana napravilo dokument koji ima preko deset stranica, nabrajajući sve mogućnosti kako da se prevaziđe ova situacija. Ja želim da Općina Gračanica, a vjerujem da i vi to želite, bude inicijativa za druge sredine. Mi moramo zajednički u saradnji da vidimo gdje smo sada, a i da utvrdimo gdje želimo da budemo u budućnosti kao općina. Uz ovaj dokument ja sam na bazi prikupljenih podataka napravio analizu plata uposlenika u Općini. I evo uzet ću Općinskog načelnika kao prvog čovjeka. Načelnik, neto plata 2.900,00 KM, doprinosi 1.769,00 KM, minuli rad plus topli obrok i ukupno mjesečno na bazi ovog matrijala 4.845,00 KM. Regres godišnji 230,00 KM i to kad se pomnoži sa 12 mjeseci

iznosi 58.370,00 KM. Cifra od 2.908.000,00 KM to ide iz budžeta. Rečeno mi je od strane načelnika da ima uposlenih 115 ljudi u Općini. I kad se tih 2.908.000,00 KM podijeli sa 12 i kad podijelimo sa brojem zaposlenih od 115, dobijemo da je trošak zaposlenih u prosjeku 2.107,00 KM. Ja predlažem da se za sve koji primaju platu iz općinskog budžeta napravi ovo sve jer zašto bi to bila tabu tema. Bolje je to javno objaviti da ljudi znaju koliko je to nego da se spekuliše sa ovim ili onim. Da se razmisli u dogledno vrijeme o raspisivanju jednog referenduma gdje bi građani mogli da utiču na to i da ograniče. Da kažu plate mogu biti toliki trošak, npr. 20% od budžeta, zapošljavanje toliko, projekti toliko. I da se napravi šablon u okviru koliko da košta općinska administracija. Zašto se ne bi za to organizovao referendum. Završno da kažem, šutnja i pasivnost su znak odobravanja postojećeg stanja. Moramo nešto da poduzmemo. Moj prijedlog je da se usvoji jedna inicijativa da se tromjesečno ili dvomjesečno organizuju javne rasprave na različite teme. I evo predlažem da prva bude zapošljavanje. Da se ta tema dobro pripremi od ovlaštenih i odgovornih ljudi. A isto tako da u tome učestvuju oni ljudi koji mogu da doprinesu kvalitetnoj pripremi tog sastanka. Isto tako da građani elektronski postavljaju pitanja, kako bi ta odgovorna grupa dala adekvatne prijedloge i odgovore. Toliko od mene.”

Vehid Osmanović: “Evo ja sam samo pripremio nekakva svoja razmišljanja, odnosno odgovore Plenumu građana Gračanice kao vijećnik. A u ime građana općine Gračanica jer i sebe isto smatram građaninom kao i svi ostali koji su u Plenumu. Ja bih se osvrnuo na prve zahtjeve Plenuma građana koji su definisani u 15 tačaka i koncentrirao bi ih u 5 grupa. Ovo je moj lični stav kao vijećnika i građanina općine Gračanica.

1. Zapošljavanje,
2. Revizija privatizacije i uvezivanje radnog staža,
3. Zdravstvena zaštita,
4. Kriteriji kod zapošljavanja u javnom sektoru,
5. Uštede na svim nivoima javne potrošnje.

Ne treba biti previše mudar i konstatovati da u svih pet oblasti itekako ima prostora za djelovanje i popravljavanje situacije u kojoj smo trenutno danas. Većina ovih zahtjeva odnosi se na druge nivoe vlasti, ali ovo vijeće može pokretati inicijative prema višim organima. Kratko ću dati svoje viđenje svih ovih segmenata.

1. Kod zapošljavanja je evidentno da su sve oči uperene u zapošljavanje u javni sektor, a svi smo protiv enormne javne potrošnje. Po informacijama sa kojima ja raspolazem, a do njih nije teško doći, u Federaciji BiH oko 800.000 stanovnika prima sredstva iz raznih budžeta i fondova. Od ukupno svih zaposlenih samo je cc 80.000 ljudi u proizvodnji. Da bi se podstaklo zapošljavanje van javnog sektora neophodno je:

- za samozapošljavanje osigurati minimalno godinu dana sufinansiranje poreza i doprinosa,
- za novouposlene u već formiranim privrednim subjektima isto tako,
- smanjiti proizvodnom sektoru poreze i doprinose kako je to definisano niskoprofitabilnim djelatnostima kao u preradi kože, obuće i tekstila,
- ukupnoj privredi smanjiti poreze i doprinose na 45% uz adekvatno povećanje minimalnog ličnog dohotka,
- jače poticati izvoz, a zakonskom regulativom zaštititi domaću proizvodnju od uvoza.

2. Kod revizije privatizacije i uvezivanja radnog staža najniži nivo je Kanton. Obzirom da su u Gračanici sve firme privatizirali radnici nije mi jasno kako se ranije nije reagovalo prema menadžmentu kojeg su radnici birali.

- Rješenje da se iznađu sredstva za uvezivanje staža prije svega onima koji su stekli uslove za penzionisanje. Drugo, da svi koji su ostali bez posla i na Birou za zapošljavanje imaju isto pravo kao i oni za koje su redovno uplaćene obaveze.

3. Što se tiče zdravstvene zaštite moj stav je da svi stanovnici danom rođenja imaju pravo na zdravstvenu zaštitu koja prestaje nakon smrti. Takvo rješenje ne iziskuje troškove koji nisu neostvarivi, a riješili bi niz pitanja koja danas stvaraju gužve, poniženja i pune biroe za zapošljavanje.

Samo ovim izmjenama i dopunama riješili bi:

- a) Da radnici za koje poslodavac iz opravdanih ili neopravdanih razloga nije uplatio doprinose ne snosi krivicu i crveni se na šalterima zato što mu ne ovjeravaju knjižicu.
- b) Da radnici koji na osnovu starosti ili navršenog staža odlaze u zasluženu penziju ne moraju dodatno plaćati zdravstvenu zaštitu do dobijanja statusa penzionera koji ponekad traje i 5 do 6 mjeseci.
- c) Procjenjuje se da bi ovim izmjenama odmah sa Biroa za zapošljavanje brisali 30% onih koji rade po susjednim zemljama i šire, pa i u BiH na crno, a oni sami ili članovi njihovih porodica na Birou su isključivo zbog zdravstvene zaštite. Masa je onih koji kod privrednih subjekata traže posao na mjesec dana kako bi na Birou mogli ostvariti zdravstvenu zaštitu.

Dalje bi kod zdravstvene zaštite insistirao da svaki lijek mora imati recept i da taj lijek bude 1,00 KM. Po analizama do kojih sam ja došao, iako nisam stručnjak, a mislim da ni stručnjaci neće moći naći bližu analizu, u Federaciji se na lijekove troši 700 miliona KM godišnje, što je po stanovniku 250 KM godišnje. Po sadašnjem stanju 1/3 sufinansiraju ZZO-a preko esencijalnih listi, 1/3 građani kupuju bez recepta, a 1/3 građani plaćaju po izuzetno visokim cijenama kao i ZZO-a. Nažalost, ja u porodici zadnjih 20 godina imam uvijek nekoga bolesnog i primoran sam trošiti značajna sredstva na lijekove. Došao sam do saznanja da su pojedini lijekovi i do tri puta skuplji u slobodnoj prodaji dok se ne nađu na esencijalnoj listi. Čim dođu na esencijalnu listu cijena im drastično pada.

Na zdravstvo u Federaciji trošimo oko dvije milijarde maraka, a imamo nezadovoljne i podcijenjene zdravstvene radnike i još nezadovoljnije pacijente, a zadovoljan je samo farmaceutski lobi, što je evidentirano i kroz plaće našeg najvećeg proizvođača Bosnalijeka.

4. Kod kriterija zapošljavanja u javnom sektoru prvo bih definisao mogući broj zaposlenih i tamo gdje je to dostignuto zabranio novo zapošljavanje, ali ne bih nikoga ni otpustio, vršio bih preraspodjelu radnih mjesta. Za sumnje u zapošljavanje po poznanstvu, partijskoj pripadnosti i slično, ipak bih dao da taj dio posla obave inspekcijски organi. Bez obzira ko je i na koji način zaposlen, ista bi priča i sumnja bila da su zaposleni neki drugi na ovim pozicijama.

5. U javnoj potrošnji ograničiti primanja koja bi bila vezana za prosjek primanja u Federaciji, maksimalno do 5 prosječnih plata u Federaciji. Topli obrok svesti na razumnu mjeru do 8,00 KM. Regres isplaćivati do 50% prosjeka Federacije.”

Za repliku se javila Šuša Larisa i u ime Plenuma naglasila:

“Pošto smo prozvani kao Plenum Gračanice, osjećam odgovornost da se javim. Prvo, pomno sam Vas slušala ali nisam uspjela da Vas shvatim, ono činjenično na početku teksta gdje postavljate pitanje koje nisam razumjela. Kao drugo, mi smo uputili zahtjeve koji danas nisu kao tačka dnevnog reda. Oni su upućeni na nadležne institucije i oni su ti koji treba da brinu o njima, a ne svaki vijećnik pojedinačno. Kao treće, drago nam je da imate dobar dio prijedloga kako i iz članstva SDA i članstva SDP-a. Znamo mi da narod zna da je ovo država za čovjeka i ne bih da se populistički deklarišem na temu zahtjeva Plenuma. Drago nam je da se građanska svijest budi, znači svih vas, a i svih nas jer se i ja lično osjećam odgovornom za postojeću situaciju. Zato bih i Vas i sve ostale rado da vidim na Plenumu, pa da zajedničkim snagama sa svim tim prijedlozima i da rješavamo stvari na bolje.”

Esad Tursunović:

“Da pohvalim govor gospodina Faruka, a što se tiče mog prijatelja iz privrede Limorada, otišli smo daleko sa tim željama. Mi imamo iste probleme, vi u Orahovici, mi u Sprečanskom polju i ne znam zašto toliko sporo idemo prema nekim većim institucijama. Ja sam otišao u Vijeće ispred SDA i razlika je samo u meni gospodine Vehida što sam ja širi i što vidim više problema u privredi ali ne zbog više političkih ambicija. Dva krucijalna problema su trošenje sredstava koji evo ne možemo riješiti. Dvanaest, trinaest mjeseci govorimo o zapošljavanju. A što se tiče stranih

investicija mi smo to pokrenuli u Stjepan Polju, došli su nam Turci. Šta smo dobili. Ništa. Ne možemo riješiti gradnju. Nekoliko mjeseci sam na svim sjednicama govorio da se to riješi. Što se tiče crne berze, odnosno nelegalnog zapošljavanja, pa 50% radnika radi na crno. Od devet hiljada i nešto koliko je na birou, četiri hiljade radi. Mi nemamo hrabrosti da kažemo ta firma to radi, sve nešto zamotavamo. Cijelo vrijeme ove naše sjednice su samo demagogija, udaranje “mrtvog mačka” i ne znam više kako to da nazovem. Mi u privredi, a i ti Vehide i svi ostali privrednici to znaju, svaki dan imamo tri-četiri problema koje moramo riješiti. A ovdje na svakoj sjednici nam se pojavi petnaest problema koje “prežvaćemo” i idemo dalje. Od ove politike od ovog vijeća i svega šta sam dobio. Krenuo sam iskreno da radim, da pomažem građanima jer i ja sam dijete s ulice, samo što nisam uličar. Dobio sam inspekciju. Nakon tri mjeseca od mog izlaganja za dobrobit građana svaki dan mi dolaze. Znam sve odakle je naređeno. A zapošljam pedeset i nešto ljudi. U fazi širenja jedna od sredina je Stjepan Polje, ali zbog neriješenosti svega ne možemo se širiti. Imamo veliki kompleks zemljišta, Bare koje će sutra ići na aukciju prodavanja a općinski funkcioneri su krenuli u parčanje tog zemljišta, odnosno legalizaciju građenja. Radi se o četiri stotine dunuma koje imamo a gdje imamo industrijsku zonu, poslovni inkubator, ne možemo graditi. Može se graditi po Gračanici kako se stigne i kako ko hoće. Ima firmi koje za to ispaštaju i nisam htio da oganizuju proteste jer bi bilo rečeno, eno ga politički. Ali kad govorim govorim kao Esad Tursunović, kao privrednik i znam kako je zaraditi dinar. Većina vas ne zna kako je zaraditi dinar kod privatnika. Ja 19.800,00 KM mjesečno trošim struje. A nema većeg poniženja kad dođeš na šalter, ne samo u Općini Gračanica, nego i na carini i dalje. Ispadamo kao građani drugog reda, od knjižice pa nadalje. Ne može se parkirati, a kad odeš u policiju, kažu po zakonu je, pa otkuda nam onda ljudi problemi ako se sve radi po zakonu. A evo dokle nas je to po zakonu dovelo. Dovelu nas je da su se ljudi digli i to s pravom. Bio sam i ja neku noć na plenumu. Išao sam da vidim o čemu ljudi raspravljaju i kako razmišljaju. Slažem se sa većinom njihovih zahtijeva. A evo idu izbori i pitam se šta ćete obećati građanima. Nećete moći ništa jer i što možete nećete. I što nećete ne smijete. Ni jednog trenutka ne izlazim za govornicu da bi se čuo na Radio Gračanici. Nisam ja Fadil Mešić, jer kad god je izašao iznio je samo demagogiju. Iznio si problem kuglane prilikom postavljanja pitanja kao da smo Mojnilo.”

Fadil Mešić je replicirao:

“Čovjek danas sve na mene, a ne znam zašto. Radio sam je Esade u privatnom sektoru dvije godine i niste me osigurali. Što se u državi ne naplati milijardu i po poreza, akciza, pa bi onda mi imali. Ja ne znam šta ti imaš protiv mene i zašto predsjedavajući već više ne reagujete zbog upotrebe pojedinih izraza.”

Sead Gazibegović:

Neću ja dugo. Svima nam je izgleda jasno kako se problemi mogu riješiti. Ima jedna izreka, sastoji se od pitanja i odgovora. Kažu, mogu ljudi biti bolji, mogu, samo neće niko prvi da počne. Jedni bi prvo da riješe problem u javnom sektoru, drugi bi rad na crno, treći bi nešto treće i onda kad to sve krene, ne znamo odakle, odnosno neće niko prvi da počne. Mi smo počeli 2009. godine i evo opet ne valjamo. Nema veze neka ne valjamo. Onaj ko se prihvati da ide na listu od najnižeg nivoa, od lokalne vlasti pa do najviše, ako nije spreman da ne valja nikom i da svašta sluša, ne treba ni da bude tu. Slažem se ja i sa ovim prijedlozima, normalno evropski standardi i slične stvari. Ali i tu moramo biti opreznii, moramo znati šta sve predlažemo. Evo, kako se predlaže jedan uposleni na 1000 stanovnika, ispade da Općina treba 47 zaposlenih. Pa kad bi mogla i 37 ne bi bilo loše. Ali da vidimo može li to funkcionisati. S kim se poredimo, sa Holandijom, sa Belgijom, sa Norveškom, sa Švedskom, sa javnim upravama uređenih zemalja. Zato naš narod ima jednu vrlo, vrlo slikovitu izreku. Skroz kratko, kaže “ne može cipela bečka, a noga lička”. Ako hoćemo cipelu bečku, odna ta cipela može na bečku nogu. Kad budemo uređeni kao te države, a uredit ćemo se. Sad je opet pitanje šta je starije, koka ili jaje. Da li ćemo prvo smanjiti na 47 u Općini pa uređivati državu ili ćemo uređivanjem države dovesti do toga da u Općini, nekad za 50 godina, bude 47 zaposlenih.”

Predsjedavajući općinskog vijeća Edin Ibrišević je pročitao zaključke Kolegija Općinskog vijeća koji glase:

1. Visina osnovne plate načelnika ne može biti veća od 3,5 prosječne plate u Federaciji BiH, plata direktora zdravstvenih ustanova ne može biti veća od 3 prosječne plate u Federaciji BiH, plata predsjedavajućeg Općinskog vijeća Gračanica ne može biti veća od 2,5 prosječne plate u Federaciji BiH, a plate direktora ostalih preduzeća kojima je osnivač Općina Gračanica ne mogu biti veće od 2 prosječne plate u Federaciji BiH. Po ovoj odluci plate mogu biti i niže što se i preporučuje, ali ni u kom slučaju ne mogu biti više.

2. Općinsko vijeće Gračanica će na narednoj sjednici smanjiti naknade članovima upravnih-nadzornih odbora s tim da u zavisnosti od ustanove predsjednik nadzornog odbora može imati najviše 200 KM naknade, a članovi 150 KM i to u mjesecu u kojem se drži sjednica, a kad nema sjednice naknada se umanjuje za 50 KM.

3. Regres se u preduzeću u kojem je osnivač Općina Gračanica, kao i u Općini Gračanica može maksimalno isplatiti do 50% prosječne plate u Federaciji BiH, takođe regres se može isplatiti i manji ili nikako ako za to nisu stvoreni uslovi.

4. Topli obrok u preduzećima u kojima je osnivač Općina Gračanica može se maksimalno isplatiti u iznosu do 8 KM po danu, a isti može biti i manji u skladu sa mogućnostima ustanove.

5. Visina vijećničke naknade će se odlukom vijeća na narednoj sjednici smanjiti za 20%.

Nalaže se članovima upravnih i nadzornih odbora i načelniku općine Gračanica da u narednom periodu, a najkasnije do 15. aprila 2014. godine, dostave podatke kojim su zaključke Vijeća implementirali u javnim ustanovama i preduzećima i Općini Gračanica. S tim u vezi dostaviti nove podatke o ličnim dohocima i ukupnim primanjima sa svim dodacima.

Hasan Puškar:

“Da se definiše samo jedan detalj, pa sam izašao u ime Kluba vijećnika SDA. Znači za direktora Bolnice, Doma zdravlja je plata plus specijalizacija, plus ono kako to već ide, ali me interesuje i pitanje je za onih šest ustanova, kao što su “Komus”, “Vodovod i kanalizacija”, Centar za socijalni rad, Dječije obdanište itd. Dvije prosječne plate FBiH i nema daljih pitanja, je li tako. Da se sve definiše.”

Fuad Alić, direktor JP “Vodovod i kanalizacija” Gračanica se takođe obratio Vijeću:

“Da kažem i ja samo vrlo kratko. Gospodin Gazibegović je u svojoj diskusiji malo skrenuo pažnju. Ljudi, postoji kolektivni ugovor koji je potpisan između države i sindikata i postoje pravila kako se plate obračunavaju. Prema tome ja ću vam sada reći da će plata u Vodovodu direktoru biti manja od plate tehničkog direktora, jer plata tehničkom direktoru po kolektivnom ugovoru je u iznosu onako kako je kolektivni ugovor rekao. Morate to malo preciznije definisati jer imaju pravila, ima faktor od jedan do šest. Jedan je čistačica, a šest je tamo neko. Početna plata je tristo i nešto i lako se izračuna.”

Prešlo se na izjašnjavanje o zaključcima Kolegija Općinskog vijeća Gračanica .

Zaključci su usvojeni jednoglasno sa 29 glalsova “ZA”. Sjednici nije prisustvovala Ahmetašević Jasenka.

Sjednica je završena u 15.00 sati.

Zapisnik vodila: Mevlida Naimkadić

Tonski snimak sjednice uredno je arhiviran.

Mevlida Naimkadić

PREDSJEDAVAJUĆI
OPĆINSKOG VIJEĆA

mr.sci. Edin Ibrišević